

摘藻堂四庫全書薈要

集部

欽定四庫全書薈要卷一萬六千七百六

集部

懷麓堂集卷七十七

明 李東陽 撰

文後稿十七

墓表

封中憲大夫湖廣武昌府知府秦公墓表

無錫秦君廷韶既喪厥考中憲公自述事行遣人上京
師請予文表墓道之石曰夔恃此以瞑我先公子辱識

廷韶知其賢而有文舊矣上溯其世得公之為賢乃表之曰封中憲大夫湖廣武昌府知府秦公之墓而為之文曰公姓秦氏系出宋國史院編修觀子常州通判洪家於官徙無錫者五世至厥祖彥和考季昇未有顯者公夙有至性生五歲喪厥妣惠氏哀慕如成人稍長嗜學強記日數百言長老皆使就舉子業厥考曰吾惟兒一人忍令一日去左右哉顧錫俗尚為詩俾學焉稍經指授輒得肯綮能作驚人語御史成始終者以詩自名

獨愛公所為遂與締交公家素裕正統間有司命長鄉

稅非其好也乃去之益肆志於學謂詞藻不足以為至

因讀論語修己以敬之言自號曰修敬志警也父疾禱

於天祈以身代憂瘁累月髮有變白者比居喪哀毀踰

制事繼母華務求其懽弟貧弗能自立贍之終身雖一

味之甘必分之歲時家祀器物必精潔雖老不以屬諸

人家教清肅訓子孫必先行檢加以禮法其為辭甚寡

發必中節對客終日風範不少類鄉子弟皆敬畏不敢

侮視有不善必相戒曰吾鄉有王彥方勿令知之尤重
義舉有貸白金百兩者覆舟而亡之歸則號泣將自經
公亟慰之曰癡男子得不葬魚腹中足矣尚惜囊中物
邪遂還其券其人感泣曰活我者秦公也公自其子夔
舉進士累官郎中知府布政使累荷錫命有名秩冠服
益以齒德重於鄉而公愈自謙抑與韋布不異有司禮
致為鄉飲大賓大夫士過者必訪於其家夔既謝事歸
事志養故公日得與諸耆舊結社賦詩徜徉林壑終其

身無隱憂亦無放言易簣之夕猶不廢巾幘子孫問所
欲言徐應曰吾於世無不足者尚奚言儵然而逝某年
月日也葬於龍山之原所著有詩集若干卷子三夔其
長次旦次夔皆輸粟拜官嘗以雙孝旌門嗚呼東吳多
文獻無錫殊盛非惟科目踵接山林名行之士亦多其
人若秦公者是已予往年歸自湖湘值廷詔宦遊於外
弗獲登其堂挹公之風公今已矣不可以復作矣可勝
歎哉公既沒鄉人議其有貞靖之行相與私謚之如吳

淵頴故事因附著之

明故江西按察司僉事馮公墓表

昔在國初洪武永樂間豪傑並用中外大小各稱厥職承平百餘年壯者老者盡子若孫代更而世易非有尊爵重位竒功異跡雖善不能傳其傳者非其遺民故吏之有知識則子孫之賢且貴民若吏之無知子孫賤且弗類不能稱述而揚顯之則終於無聞豈不重可惜哉若浙之餘姚有僉事馮公者人始未之知也公諱本

清宋樞密使京之後曾祖通義祖彥誠考伯泰皆隱於鄉公生於洪武元年少學春秋遊縣學膺貢為國子生授湖廣道監察御史在壬午之歲蓋所謂三十五年者也永樂甲申奉文皇帝勅同錦衣衛刑科官撫蘇松常三府長洲有宿盜聚至數百人督兵擒之同事者欲槩論大辟公不可奏誅其首惡十餘餘差為五等皆得不死上海行臺有淫祠為孽前御史輒避不居公入而毀之妖遂息他如按贓吏振士風善政尤著再巡四川甘

肅亦如之都御史顧公佐重許可凡臺議疏奏俾閱而
後行庚寅扈從北狩歸辛卯考績擢福建按察司僉事
分巡漳泉諸府兼理海道庭無畱案惟死獄必請平反
甚衆府歲輸番貨百萬而非其產公請半折鈔以甦民
力建寧大水溺者爭附槎木蔽川而下公聯百艘為浮
梁截流救之活數千百人會天變陳時政甚見嘉納時
逋賦繁重廷簡方面官公道徵之公得太平諸府以民
貧不忍督迫善為撫諭民感激為之稱貸以輸僅踰月

而畢事宜德丁未改江西巡饒信諸府與御史俞謙錄
囚安仁方莅事忽得風疾端坐而逝俞督官屬治棺斂
歸其喪葬焉年六十矣其為人孝謹廉直不苟為趨避
久且不變嘗自號曰介菴人亦以是稱之子某孫某曾
孫幾蘭舉進士為翰林庶吉士累官江西提學副使文
學治行綽有時譽為當道所阨而罷論者至今惜之公
墓在縣之華原正菴植松成林蔚為鄉望成化間海溢
盡壞提學歸手復封樹為廬室後以其伯及父祔焉間

為書抵予致太常呂少卿升彰狀請表公墓公之沒越
四世八十年而其事乃大顯於世蓋自提學始若予文
惡足以為公重哉

贈戶科給事中薛君墓表

易稱幹父之蠱蓋取諸器書稱堂構播獲蓋取諸田與
室皆以小喻大家之有業莫切乎是三者君子之論興
替必先焉則其大者可從而識矣且子之於父蠱有幹
以為之用室有構以為之居田有獲以為之食則凡其

親之饗於身者皆其所自遺也而况有大於是者乎予於薛氏之興得其父子之賢因為其子表其父以為世

勸君諱雲字成霖本河東望族譜傳自唐少保稷始居常州江陰之寶池鄉今鄉有稷山實以是名五世祖薛兼入國朝以楷書召預書誥勅引疾歸其鄉兼生文遠出贅黃橋楊氏生佺世有隱德佺實生君君髫時以才俊簡為縣學生比長為尚書舉子業業成連試不利丁外艱力治喪葬服既闋猶悲慟久未起復學官以曠廢

舉白當道例黜為府從事君隱忍就役然不為習變知
府孫仁御下頗嚴獨器重君委以雜務幹治井井部使
以猛厲稱者亦假辭色遇之值歲饑輸穀若干斛以佐
賑貸獲給冠服待次家居者數年期且至不屑就選竟
弗出平居友愛諸昆弟有過則懇曲開諭撫羣從子不
異已出有寡姊事之終身棺斂葬祭必親治雖冒雨感
疾弗卹也其治家嚴而有則子姪無少長侍立終日下
逮廡僕咸凜凜屏氣息靜閒寂肅如公室而教子尤切

以所業授仲子金曰汝為我成之金之舉鄉貢也猶及見
焉既卒之三年金舉進士入翰林為庶吉士又二年
授戶科給事中又一年今天子御極恭上兩宮尊號以
恩贈君徵仕郎戶部給事中蓋金以文學論議顯於時
以及其親而君之志始畢論者謂金於是乎能子金念
父德久不白間奉張進士簡所著狀請表君墓故書之

明故贈文林郎廣東道監察御史石公墓表

予每檢故篋見同年按察副使石君大器所著其父文

林公行狀蓋徵予為表墓者復十餘年君之墓木已拱矣而舊諾尚闕未嘗不憮然感之比其伯子玠以御史繼為副使提學山西仲子瑤自講筵擢南京翰林侍讀學士將道歸省墓則須此以行嗚呼是安可負哉按狀石氏為真定橐城世族其先有長卿漢卿才卿者並以直義聞於鄉里人至今稱為三石家元季喪亂子孫皆轉徙他郡入國朝乃復故業公祖諱永考諱友智世有隱德公生而爽朗曠達不事容飾學春秋永樂癸卯舉

順天鄉貢甲辰中禮部乙科授山西臨晉縣學教諭時
年甫弱冠抗顏立教寬而有則人不敢易視當道亦器
重之使攝縣事坐逸死罪囚就逮罪且不測按察廉其
無他以常律論左遷廣東河泊所大使人以風土弗習
諷令勿赴公曰事君者罪不逃刑亟上道數年以疾卒
於官年三十有二而已識者惜之配時氏早卒繼孺人
徐氏廣信上饒人宋國子祭酒元杰之後父聆知棗城
因家焉孺人婉孌幽潔通書史義公在臨晉時禮迎於

官年二十有六矣在韶遭公喪力謀返葬有張參政者
橐城執友也欲留俟入覲挈之以歸辭曰父死之謂何
而宴安是圖至上饒宗人亦留之曰聞而父門戶已落
太夫人亦謝世歸且無所於依是父母之邦也盍少駐
焉復辭曰吾尚不敢緩而敢留乎竟間關違橐城族黨
尊幼皆壯而悲之既葬公命其子曰璽汝力父田曰玉
汝讀父書玉大器名也其後產數破孺人脫簪珥給膏
燭且盡則勸耕課績以共之如是者幾二十年及玉舉

進士為監察御史每諭以平反故玉持憲久雖號嚴肅而常依於恕成化丙戌府縣上其節詔旌為貞節之門明年丁亥卒於京師年五十有七又三年玉以考最贈公文林郎廣東道監察御史孺人亦被封命人蓋曰石氏有子及玠瑄繼舉進士以文行論議合舉其官則又曰石氏其有孫乎予嘗歎按察君才不盡用以為公所積累抑而不發及再世迭見方隆而未艾然後知蓄之久者發必大在物固然而非旦夕所可必也然則士君

子修德行義固將盡所當為而曷嘗以預必哉苟其願皆可以預必則世之乘時射利竭志力以毆之者無所往而弗獲矣因表石公以為世戒

翰林倫封君墓表

士有所負挾而不用不過施於家及乎其鄉而止其名與姓天下蓋鮮知之及生而有子有子而能教教之賢且貴則因以錫於朝廷而聞四方然非身有其實亦不過憑藉光寵而止惡能久而不朽哉予嘗求之嶺海之

間則倫封君其人也君諱明字宗立號月林少嘗問學性敏而幼年十五遭黃賊之亂疲於竄越弗克究厥業兵荒後僅修牆屋室如懸磬備歷艱苦躬農販為養有伯兄某號穀林先生者為鄉校師卒君適代其事志兼數學博綜羣籍寄情吟咏已而大有所得或謂其才局非乾沒者諷令幕書州郡以階仕進君謝曰吾年四十而無以自見其所就可知而更進乎識者知其異辭以謝實非其好也自是抹掇世務混跡鄉落益務為韜戢

不以所有先人而中屹屹不為流俗所動五昆弟皆蚤
世撫其孤八九人當門祚哀落子立無援而強獷有力
者不敢以弱肉視之誤有吞噬旋亦脫牙吐喙以去君
夷然一聽其所為顧值不平事則善為開諭不假激辭
怒色而悔心革面者亦時有之遠邇人士造訪寄寓傾
接之際皆自以為不及且曰有人如此而世不見錄焉
何也文叙以省元聯擢廷魁授翰林修撰君就養京邸
公卿以下謂文叙志行識度足當遠大及見君則相與

歎且羨曰固宜有子如此君歸一年勅封如子官階儒
林郎貴有名秩監牧守令庭分禮抗非復曩者比而君
亦遜處欲視若韋布然於是益以見君之賢云今天子
嗣位文叙頒詔安南將過家展覲未至道得訃乃奔還
襄事而告守制於朝禮也倫之先以爵氏散處闕輔唐
末多避地嶺南宋有自南雄起為廣州教授者始居南
海縣之魁岡祖觀德以上皆隱於農父叟號聚慶先生
殖善為業期至君當顯再世乃大顯君生宣德某年卒

於弘治某年其葬也文敘依朱子家禮誌於壙直述其族里生卒曰我不敢文也其上京師請予表墓奉監察御史張君津狀曰是皆實行取質於吾鄉者我不敢誣也予以文藝知文叙於人人中久而信其賢且嘗一再接君得其所為教者因為文表君而亦舉其實庶幾信於其鄉以及於天下俾其後有徵焉

明故河南布政司右參政進階嘉議大夫顧君

墓表

吾友雲厓顧君居母喪時廬於姑蘇周山之墓予歸自
湖南夜眠抵廬下呼而起因歎世所旌廬墓事多文而
寡實雲厓既不自衒當時有司亦無能旌之者後三十
餘年知府林世遠始旌於朝未及報而雲厓卒矣予故
表於其墓特舉其大者先焉雲厓始顧氏諱福字天錫
雲厓其所自號世為江東著姓曾祖某祖某皆隱於鄉
考諱賢以工籍隸順天之大興後贈儒林郎光祿寺丞
雲厓以成化乙酉舉鄉貢丙戌登進士第歷刑部主事

員外郎郎中調永州府同知遷知吉安府擢河南布政
司右參政分司南陽致仕卒初在刑部聲甚著錄囚山
西多至七千餘衆平反者六十餘人前後四十餘疏多
見采納每攝他司事事皆立辦勘獄浙江發巨贓七千
餘兩時錦衣千戶吳綬勢甚熏灼勘獄者皆往受成議
雲厓獨不往會下詔獄遂摘其疵誤出永州受檄決獄
至兼旁郡有部檄徵芽茶香草雲厓計合藩所徵全數
上疏請停之至吉安承大猛後稍濟以寬剝理繁錯不

動聲氣而條緒具舉張都憲公實周都憲時可劉侍講
景元皆慎許可特稱顧君獨不善事上官或以簿書相
窘然即所治校之諸郡不啻兼之矣陳時政六事時議
躓之參政報至民兵數千人遮道泣送府府及千戶所
各留一鞞以表去思南陽宗藩軍校多不戢每用理斷
亦無怨辭撫徠流徙復業者至四千餘人修諸葛武侯
廟及閱武場開拓有加其去也以老疾名蓋郡人在言
路者以私請弗獲故陰為媒孽而其藩人猶惋惜不少

置雲厓乃自歎曰藩不負吾而郡負吾賴幸有二三知己者存尚何言哉知己者張劉周也雲厓既歸日與鄉大夫士觴詠為樂足不至公府手不操書札惟歲時以詩寄予未病前一月猶然嗚呼詎意其遽至此耶雲厓尚意氣故人潘郎中琚客死斂葬之其子鼎方十歲攜以自隨比長以女贅之又置田廬於蘇居其寡孤後鼎舉鄉貢卒於京又遣人葬之趙知府禎沒又以次女妻其子鎬尤篤倫誼弟祿早世葬北土者二十年亦歸祔

祖墓卹其嫠俾不貳志今旌為節婦事其兄光祿丞禎甚謹嫂欲折居即俯孫於外泣告於兄乃得歸然引咎自責未嘗一以語人人益難之而廬墓事尤大且著云

明故刑部員外郎劉君墓表

刑部員外郎劉君天瑞既寢疾自度不能起屬其子翰林編修龍請子表墓君母太恭人之葬子實為銘銘表皆以龍請者龍蓋子禮部所舉士也乃按豐編修原學狀而表之曰君姓劉氏諱鳳儀天瑞字也譜傳出宋元

城忠定公後有曰務者避金亂徙潞之襄垣凡八世曾祖徵明歷數國初以遺逸徵不就祖端永樂間貢士終新安縣學教諭贈監察御史考諱潔景泰間貢士歷御史至浙江按察司副使君弘治庚戌進士授高密知縣值歲饑後逋租萬計民流徙且半極力綏輯復二千餘戶逋亦寢舉久之積穀至三萬石以上自是饑者賴焉忽大旱禱而雨蝗傷稼亦禱除之縣地多荒令民自墾田得四十餘頃戢奸宄均賦役獄雖小必親鞫非捕巨

猾隸卒不至於鄉民甚安之比召入邑人為刻石紀績
為戶部主事分司臨清出納明允以內艱服闋改刑部
益精覈弗懈庭無滯囚凡所受判往往皆帖服以去然
君亦以勤悴致疾比遷員外郎階奉訓大夫未入謝而
卒君少孤能輦觀歸葬結茅墓左課耕養母以孝敬稱
撫庶弟鳳鳴口授經義每遊宦必攜以自隨姑所生子
委以家務二十年求去恣所欲取仍割田廬畀之叔母
陳寡而無子母事之且為置後媼黨婚葬亦視力為周

卹有疾屬來省疾操白金佐醫藥費君泣曰吾宗多貧安取是是益吾疾也竟弗納內弟有遺女失所會李氏女沒俾繼之曰猶吾女也其篤恩義類如此初按察公之從治荆襄也叛者伏法流民未有處君時尚稚以私書白公曰宜因而籍之按察欲上其計弗果後別命官往治果郡縣而定按察竟以是竒之及有官守更歷曹署不克究厥蘊以沒然劉氏祖子孫三世皆以文學行業取高第為美官至翰林乃益顯君之志固不終負哉

味泉錢處士墓表

無錫錢氏故文獻家子所銘識者殆數人大抵以工部
郎中世恩請比其叔父味泉處士卒且葬又請表焉其
辭曰榮固知先生之弗遑及也顧以榮故意者其不終
拒乎嗚呼世恩固能文也而必我之託蓋將以公視而
不敢以私預也處士諱濬字孟濬以居邇惠山因號曰
味泉鄉之人謂其不屑仕也皆稱曰味泉處士生而峻
疑多智識而沈默不外見弱歲代父長鄉賦不令而集

居常勤穡事月累歲積其所拓業百倍於初然益儉節
不妄費一錢獨喜交賢大夫士館穀餽贈未嘗色恡亦
不以盛衰存亡易心用是名籍籍動三吳間每市田物
必稱其直佃夫之貧者歲所入租常十免其一又以其
二貸之而弗收其息於是佃者德之相戒莫敢負業顧
以益裕歲大祲凡三出粟以佐賑濟郡守擬授七品階
不受以移其子杞杞亦屢出粟薦陞蘇州衛指揮僉事
縣令復欲官處士不能彊卒旌其門禮之為鄉飲賓處

士雅服孝義少刲股療父疾居喪哀毀如禮譜先世所遺文字自武肅以後若干世凡若干卷傳於家自族屬暨於鄉黨道路周窮卹嫠各當其分嘗造石橋四佐有司者半之餘所施藥茗棺槨諸物多至不可數宋人所輯名賢確論者近始出鈔本騰貴或至一金處士刻置家塾其傳寔廣蓋其晚歲所為義舉類如此而未竟也處士年及歲制乃自治壽藏於艮山之原壽七十有一而卒君子謂達生知命正受而全歸者處士近之矣斯

可謂一鄉之善士非耶

贈文林郎廣西道監察御史陸君墓表

君姓陸氏諱溥字宗傳蘇之長洲人系出吳大司馬抗
宋有千九朝議者始居陳湖四傳曰仲祥以力田為鉅
家又三傳曰起敬娶於周壯而無子間夢其先人抱一
兒遺之乃生君性溫厚謹飭有鉅人度稍長其父若母
若所生母夏繼卒能禮治喪祭去佛齋弗用人稱為難
既乃與其弟宗涵協力家政以儉朴率下家益起平居

無私藏一飲食未嘗不共遇族人恩意尤厚恒曰人能
以祖宗之心為心則何疏戚之間居室服食待君而具
者數人所識窮乏若急難赴之惟恐後郡縣廉其賢推
長鄉賦事不告廢而以身為民庇者尤多未中歲輒營
別第將謝紛冗從賢士大夫游以詩酒圖史自老而遽
嬰疾以卒其年甫四十二後十年以子完貴贈文林郎
廣西道監察御史方君之疾也鄉人相率走神祠祝曰
幸活陸君以終惠吾人比卒皆往弔且哭曰公需甚急

孰為我紓之歲輸漕粟多以破家產孰貸我往役而蠲其息地若潦荒孰不幸災為利且代我出粟以償逋賦如吾陸君者是言也流聞郡城郡之人皆歎且惜之今吏部侍郎吳公原博為君銘載其事為詳予得而觀焉夫天道好生故人之能利物者天必佑之若賞其心而酬其勞至其多寡輕重亦若有典籍存焉雖旦夕不相應要其終未有不合也世之人知善之獲福而不為甚者肆為兇惡以召禍取僂甘其心而不悔亦獨何哉陸

君一布衣無榮辱予奪之柄而惠澤所被至使人樂其
生而哀其弗壽以死其可謂之善非耶身沒未幾而子
登高科為顯官行績表著馳天子之寵以耀於厥世君
之所得顧不既多矣哉夫使富者散其財強者輸其力
顯者施其澤一人倡之百人從而效之自一鄉一國以
及於天下天下之福寧有窮乎君之澤在一鄉君之子
又將為天下用天之報君蓋自是未可量也然則錄名
紀行以垂後世非獨以勵為善亦豈不足為有子者勸

哉

卷七十七

懷麓堂集卷七十七

欽定四庫全書薈要卷一萬六千七百七

集部

懷麓堂集卷七十八

明 李東陽 撰

文後稿十八

碑銘

明故正議大夫資治尹戶部左侍郎吳公神道
碑銘

弘治九年某月某日賜葬戶部左侍郎吳公於漳浦雲

霄里之原蓋公之卒朝廷特賜賻鈔三千貫又給驛歸其喪遣官諭祭而其葬則有司所治者也公舉景泰初元鄉貢登天順八年進士授兵科給事中時憲廟新即阼百司皆悚厲修職公陳正心用賢簡名將斥異端諸事成化四年與諸科合疏請溥恩澤以廣繼嗣七年遷右給事中九年轉左給事中以外艱去十三年改禮科十五年進兵科都給事中西廠久熾公乘衆忿倡諸科劾罷之有鎮雲南者肆貪虐鎮遼東者匿賊不以聞又

劾之為諫官二十年前後論奏數上雖少忤不變又奉
勅督馬政考牧有法見稱為才十九年擢太僕寺少卿
再閱京營馬數又召商市馬若干匹以給邊兵二十二
年進為卿二十三年用廷薦擢戶部右侍郎總京儲事
寬不弛制邸官卒多怙勢擅出納輒繩以法今天子嗣
位公莅事益謹弘治四年遷左侍郎部事五年浙東西
大水勅公兼都察院左僉都御史往視其地公宣德意
諏民隱勸分平糴給米穀三十萬石銀七萬兩蠲累歲

逋賦數十萬他如修海隄塞銀冶嚴禁溺女申婚禮舊制援古人政迹著為編刊布諸郡民甚德之六年召還部在部近九年歷二考累階正議大夫資治尹壽六十五疾卒乙卯十一月十三日也公諱原道本其字髯而長身器宇豐碩性篤厚不樂為深刻居官能以儉養廉而不廢賙給同里客死凡數人皆為經理後事甚者殯於家雖盛暑大疫不避也痛父棄養力共母事為給事嘗乞歸省為侍郎再乞得賜鈔接驛以歸鄉人榮之尤

景慕先哲嘗請立宋儒陳北溪祠歲祀於鄉為詩文渾雅可愛有奏議雜文紀行錄及族譜若干卷藏於家公與予同舉進士久且厚比遣子學於予予既往弔哭從其子之請按翰林黃編修瀾狀叙事著銘俾刻於神道之石銘曰

吳出秦伯族散南紀由江逮湖東際於海漳稱名邦有地高塏實生偉人出佐天子為名進士為中給事薦升大僚以長卿寺載遷戶曹式贊邦計勲庸被褒封及祖

彌惟祖及彌世積仁累溢為巨流有決其匯曷徵厥源
如彼漳水公澤不匱式續式似有來後人公德是視

明故贈通議大夫都察院右副都御史徐公神

道碑銘

有談常熟徐氏之盛者溯處士公之賢云公生元至正
壬午卒於國朝永樂丁酉壽七十六有子一孫八曾孫
二十一玄孫二十三越八十餘年二傳至若干人而來
者未艾其盛如此公幼通書史大義旁及藝數弱冠學

春秋未卒業會大兵下蘇州乃奉其祖父母徙縣城備
涉艱險連遭四喪造次不廢禮已而復徙郡城吳元年
天下大定始挈家歸漁梁業已廢極力營治久乃寢復
而悶不自耀益慎游處每求自益時吳文恪公訥未有
名公一見定交吳既顯亦重公不置也公居鄉恒服義
食力利所不當取寧棄弗顧晚倦家政一以付其子訥
獨寄興林石間或歌咏竟日意不厭每自詫曰使吾嬰
一命於時寧復有此樂哉一日謂訥曰吾平生無大過

人者惟以勤慎自免今亦遺爾矣因沐浴就寢明日復與
兄子言保族宜家之道甚悉乃脩然而逝訥後以行義稱
贈工科給事中累贈如公官君子曰不愧其父恪清慎不
苟嘗巡撫兩藩風裁卓卓為時名人君子曰不愧其祖然
則公之所自立以待其後之人者亦豈獨官爵間哉銘曰
明覆九宇蘇實畿輔粵有遺民虞山之下遯形巖穴寄
跡城府抱貞履幽永謝圭組首霑王化若飫膏雨晬盜
終身行罔疵窳曰予靡憾中足仰俯有生必歸此固其

所斂華約贏以遺來者粵一再世螫若蝨羽有聞厥孫
若翼斯舉為國卿佐光施於祖沿流溯源勢孰予禦生
有堂構沒有封樹維百餘禩望彼南土穹碑峩峩下有
行路路人載言都憲之墓

明故嘉議大夫南京太常寺卿陳公神道碑銘
吾友太常陳公之卒也予暨諸同年會哭於京邸退各
為文以彰潛懿予知公最深獨情且劣久莫有所就惟
負公地下是懼越五年其子華赴試北上泣且告曰神

道石尚未銘吾父於先生蓋有託焉予泫然感之乃按
通政鄭公廷綱狀為叙及銘公姓陳氏諱音字師召自
號愧齋莆田涵江人也宋明州觀察使淬暨子仲剛同
死靖康之難旌其里曰忠孝坊子孫居之至今曾祖宗
義祖光遠世有隱德考澄崇尤號長厚累贈南京太常
寺少卿妣黃氏贈恭人公少為興化府學生業詩經有
名天順壬午舉鄉貢甲申登進士第被選為翰林庶吉
士劉文安柯竹岳兩先生奉詔授業殊器重之成化乙

酉授編修丁亥與修英廟實錄成賜白金文綺加從六
品祿嘗上疏陳時政數事如乞起李秉張元禎復羅倫
章懋用陳獻章革法王佛子名號皆剗直不阿當道者
或銜之不為動中官最貴者有母喪或議旅弔公奮曰
堂堂翰林相率而拜內侍之庭奈天下笑何議遂止丙
申九載遷侍講加從五品祿侍經筵西廡方熾其黨韋
瑛者夜帥邏校入兵部主事楊仕偉家掠其妻公居比
舍亟乘墉呼曰爾何人乃擅辱朝臣其人曰爾何人乃

不畏西廠公曰我翰林侍講陳音也聲氣愈厲其人為之少戢辛丑同考禮部會試時稱得人癸卯擢南京太常少卿供祀修潔凡廟薦必躬視緘識簡置官屬不受私請嘗兼南京翰林院事人皆曰公真學士也而乃攝邪弘治壬子九載奏績始升卿於是公資日深望益加重每兩京列卿缺輒擬屬之而竟弗及以卒卒以甲寅六月二十五日年五十有九朝廷遣官賜祭命有司治葬於某山之原公問學深博學者至席不能容若太常

卿齊章通政吳裕少詹事王鏊其顯者為古文歌詩簡
而有則四方購者無虛日所著累數十卷藏於家其為
人天性孝友痛弗逮養每忌辰悲終日念仲弟祖之勞
為輸貲得冠服教季弟員舉鄉貢今為嘉興府通判叔
母林與婦偕寡屢給之婚其遺孤舉其喪媼里旅寓者
視貧富踈戚為調施有急則力赴之與人交樂易信厚
畧邊幅遺形跡有過則箴切不少貸平居細事多不經
意或遭嘲謔無所校至分別義利則界限截立中有執

守有毅然不可奪者焉古稱仁者必有勇信哉銘曰

惟天生才國用攸繫氣厚則純漓者反是繫我純皇初科

策士有才孔碩公稟惟粹公生海涯跡遠都市內剛外

和惟德之備有文弗誇如絢斯衣翰署詞場留臺禮寺

官非顯曹力有餘地流俗可鎮懦夫可厲彼葩弗實曰

辭與藝豈吾弗能匪此奚恃公弗大用世豈公置榮途

顯階公亦自避彼挾數者皆謂予知不旋踵聞車覆馬

躓惟公考終得正而斃嗚呼愧齋可以無愧

大明陝西三原縣儒學教諭致仕贈光祿大夫柱
國太子太保禮部尚書兼武英殿大學士劉公
神道碑銘

少傅劉公嘗出所述先公家傳且道父德之詳謂東陽
曰吾先公之葬久矣神道之石尚未銘所以告子者非
徒言也子為我銘將俾吾子東刻之以畢吾私焉東陽
在館閣從少傅公久誼不敢以不文辭乃敘而銘之公
姓劉氏諱亮字彥明其先出開封太康祖諱紹祖元順

德路總管卒葬某州祖妣夫人翟氏河南洛陽人也有

子榮方九歲留居順德值元亂翟二弟居瑞居理迎歸
洛陽入國朝遂定居娶曹夫人生二子其次為公公早
有識量七八歲如老成人弱冠為縣學生永樂庚子舉
河南鄉貢宣德庚戌登禮部乙科授陝西華州訓導條
格嚴整尤勤訓迪不任私喜怒為賞罰嘗再攝渭南縣
學兩學生皆父視之賴以成材者甚眾正統己未以母
艱去壬戌改山東濱州學雖不久任誨亦弗倦癸亥考

最遷陝西澄城縣學教諭俗戇直難訓公用剛克畢就
矩矱乙丑以父艱去丁卯改三原縣學公愛其士多秀
敏年雖高猶日夕講授不輟寒暑景泰丙子秩再滿乃
致仕歸天順癸未十一月十二日無疾而終壽七十有
七少傅公既貴累贈公及祖考皆如其官考及公皆葬
洛陽東侯里為世墓云公素孝謹事父如嚴師既仕每
值訶責猶跪俟杖怒解乃已暨兄寬勤苦樹門戶居相
慕愛老不色忤兄子數少失母躬撫教之與人恭孫未

嘗騎入里門見老長雖賤必拜然介直寡合好面斥人
過不為私議里有不檢者訖其歸匿不敢見人用是稱
曰板劉平生務實學其教以明理飭行為本不專文藝
學者皆畏且服之在濱嘗病暑兩坐諸生更執蓋立侍
比秩滿爭遣子弟挽車上京師訖改任始返其去澄城
值道梗諸生共推勇有力者護之行次朝邑盜忍夜至
競升屋操挺石敵之盜不敢近比曉乃引去沒後數十
年諸家子姓傳道舊時事猶戀戀不置其感人深如此

亦可謂難矣嗚呼古以栽培傾覆喻善惡之福禍此理之常然必要其終乃可以無爽惟公樸學直道位不滿德天固將優之今少傅公名德重天下屹然為一代元臣勲業所被皆公教也國有錫命家有廟祀魏階顯號上逮三世科第廕澤蟬聯而不絕則公之所獲孰與朝榮暮悴競得失於顧盼之間者哉然則揭名著行俾後來有所據法非直典式所得為者具於倫誼風俗宜不為無補也銘曰國有大老元氣是鍾曷徵厥成於彼先公公名賢科公

職黷宮廉貪植懦君子之風牖昏擊蒙儒者之功嗇不
世用於家則豐吉不在躬於孫其逢帝曰予弼其佐朕
治惟我先卿教澤攸致曷其報之有燁明制顯號穹階
躋於極地瞻彼洛矣其源千里於河於海其流無涘公
生其邦毓靈受祉其澤不匱有如此水後百千祀視公
孫子

明故贈通議大夫都察院右副都御史何公神

道碑銘

刑部右侍郎何君世先為都察院右副都御史巡撫山東時以書狀抵予請銘其祖素菴公之墓比入朝又以辭趣予其書曰鑑少承吾祖之教占一第歷官數命有姓名於時而祖德弗著曷以稱孫子是以請也其趣予之辭曰鑑已荷錫命贈吾祖以官階躋三品寵貤再世足以昭身後鄉所以未敢亟者蓋有所待也其狀畧曰吾何氏本青州人五代時有諱茂者仕吳越錢氏為節度使卒於紹興之新昌因居之十有四傳至訓導府君

又傳至處士府君以至吾祖吾祖少失怙與吾伯父彥
溫營葬事置墓田若干畝奉母必躬具甘旨疾則籲天
請代或親滌牀簣及瘳乃已正統己巳方居喪忽訛言
閩處寇至舉邑奔避或請行吾祖泣曰母柩在吾將焉
往竟亦無他居墓廬久得寒疾親族強之始歸鄉人皆
稱曰真孝子也事兄謹家政必請而後行田宅服器皆
以義讓子其遺孤無間言有族弟貧且徙留為娶婦給
以本業俾不失所時祀畢則合族而燕以禮法訓之敦

朴自守足未嘗至公室邑大夫禮為鄉飲賓亦不赴博
涉經籍以目疾不求仕鑑蒙時教以四書小學皆口自
默授比長遣遊邑庠俾治舉子業曰吾以畀汝矣鑑舉
進士為知縣為監察御史吾祖皆及見之及為知府為
參政為布政使以至今官而吾祖已不作久矣吾祖嘗
以書教鑑曰為官必律已愛民毋撓法毋為利誘毋逸
以自敗鑑謹識之其他得於吾父者大抵皆祖之教也
吾祖壽八十有五生洪武某年卒於成化某年是歲十

月十五日葬某山先墓之外壠予昔校文禮部得世光名及觀其才識行業卓然知其賢邇祖德之有原乃敘其所自述者如此公諱浩字彥廣其祖訓導曰友諒父處士曰遵道長子曰璉皆世光所自諱故特書之銘曰維越新昌山還水重公居其間韜真葆光服義在躬孝為之先如彼襄陽有龐德公遺子以安關西有楊清白之風後裔是傳種德之方與種樹同以歲以年如穀在場晚食其曹其耕孔難為時名卿為家大宗惟子斯賢

身雖云亡終饗其封天道好還刻此銘章昭潛發蒙世
永勿諼

大明故資政大夫南京禮部尚書致仕贈太子
少保童公神道碑銘

天順癸未公分考禮部東陽與今太子少保吏部尚書
倪公皆在選公之卒倪公實為銘墓且經理其家東陽
遠且劣無所於助乃按通政參議夏君崇文狀撮公事
行之大刻諸神道拜系以銘公姓童氏諱軒字士昂本

鄱陽鉅族也祖諱金友考諱碧瑄號玉壺以號顯皆用
公貴累贈南京禮部尚書玉壺在永樂初徵為欽天監
天文生始居秦淮之西為南京人而公生焉公少為應
天府學生舉正統丁卯鄉貢登景泰辛未進士拜南京
吏科給事中上疏言省冗官杜倖進公考察倡武勇擇
師傅諸事又請賑南京饑民多被采納乙亥詔留司貢
翠羽魚魷諸物以萬計公極論止之英廟復辟檢公奏
嘉其敢言公因言弭盜安民數事天順戊寅劾戶部尚

書張鳳罪名益起己卯丁嫡母憂辛巳服闋改戶科憲
廟踐阼公首言帝王之治在修德納諫愛卹小民因請
召儒臣稽祖宗謨範及古帝王修身立政之道著為大
明一經以次施用命在庭三品官舉堪為大臣及布政
按察者上優詔答曰軒言良是朕當自勉有司其各議
行之四川盜起公承勅往治徧歷賊巢宣布威德諭以
福禍賊數十輩迎拜請命公召同食飲示以不疑降者
漸衆進都給事中偕巡撫及守臣分兵掩捕亦多斬獲

奏功還朝未幾盜復作廷議乃歸咎於公致以重辟公
請用守臣奏疏為驗猶坐免官上察其情不忍重譴調
壽昌知縣成化己丑述職京師禮部尚書姚文敏公薦
之擢雲南按察僉事兼督貴州學政多所造就為御史
所旌甲午召拜太常寺少卿掌欽天監事覈生徒簡官
屬省諸浮費僥倖者皆不便居悒悒不自樂累以疾辭
不許己亥進秩為卿言陰陽官輸粟免考為非制癸卯
又辭許焉弘治戊申監正官闕衆復以公薦今上命仍

舊任公言日食紀元之初當盛夏火王之候宜正心修
政進君子退小人以應天變尋自言本不習天文乞改
他職久之改都察院右副都御史督松潘軍務兼領巡
撫開倉賑荒設粥食餓者給糧以徠流民製兵車為禦
敵具請出官帑以充邊餉復陳三利八害薦按察使林
俊可任都御史皆不果行召還道擢南京禮部右侍郎
甲寅進尚書前後上數千言間謂朝廷大政廷議倉猝
不能盡宜如古昔公卿大夫各得議識者躉之丁巳再

乞歸語益加切上乃許之以公既滿三載特給誥命戊午二月十九日卒於正寢公配陳夫人先卒上特遣禮部諭祭工部治塋域至是贈公為太子少保啓窆合葬且為增飾而祭之數亦加其一云公事嫡母甚孝分祿以養兄嫂遇諸媼舊皆有恩顧性寡合孤居介守不苟受餽遺為時所重強學好問為文通博詩尤麗則得唐人體裁所著清風亭稿行於世枕肱集海嶽涓埃諭蜀稿籌邊錄藏於家銘曰

維皇舊都實萃英傑公生其間行藝踔絕為中給事論
議孔揭出撫夷徵誓掃氛孽有勞弗甄遽爾蹉跌外領
州縣起佐藩臬司天嚴秘禮寺清切為都御史佩符仗
節入登留曹在六卿列若操大阿歷試不折若馳康莊
逸駕中輟始終完名竟免磨涅我銘公行以俟來哲

明故贈通政大夫南京刑部尚書戴公神道碑
銘

西澗戴公之葬也侍郎楊文懿公為誌厥配吳氏學士

柯竹品先生誌焉尚書王文肅公合而為之表後數年

公以子珊貴累贈南京刑部尚書吳累贈夫人秩二品
制得為碑神道後珊入為都察院左都御史以東陽同
年進士與聞世德乃奉表誌及狀請為銘狀蓋公子瓌
所述夫人狀則公所自述皆諸作所不能悉載者也按
戴氏自晉侍郎濟始遷江南唐兵馬使護居婺源後有
士先者舉進士知錢塘縣徙浮梁至於今居焉曾祖德
誠元麻姑寨巡檢祖疇國朝洪武初有司徵不就考嗣

安鄉稱長者以子昇貴累贈陝西布政司右參議復以
珊贈如公官母徐氏封太恭人累贈夫人公諱嘏士儀
其字少承家學博覽強記詞翰穎出永樂庚子以春秋
舉湖廣鄉貢有司錄其文甲辰舉禮部乙科授順德府
學訓導當兵後人不知書公教未幾士頗向學調嘉興
府公病文勝先行檢重經術故士多實才而公亦以績
最進德清縣教諭一新學政士不舉凡十科自是舉者
不絕父喪服闋改慈谿縣士恨得公晚然化其教者亦

多有之秩滿歸省母母適病卒服再闋擢教授再蒞嘉興學者益衆有富民數輩遣養子入學公不可民激按察官強公公報愈確坐是忤意竟以他事去歸營西澗休休谷嘯傲其間人莫之測也初號訥菴至是號退叟著西澗集及浮梁縣志若干卷公夙負才行慷慨有大志事親孝謹昆弟交睦從子瑞早孤撫教之後舉進士為吏部郎中有名應舉時道見一士病卧風雨中瀕死扶入寓邸療治之久而甦謝曰我郴州高信也既揭榜

信名第一其重義輕施多類此官以身教意識所到輒
抗言高論不嫌越職抗湖諸府漕倉去河遠奏徙之嘉
興吏胥時被繡乘馬海觀諸衛進表牋多不如制皆奏
禁之建陽知縣張光啟偽稱其先世從文天祥起兵竄
入舊史亦奏削其板嘉興民坐豪當籍都御史咨公公
素嫉其人顧以為罪不至此力解之有提學官以喪去
朝議將起復執政者語及公曰是風化所繫恐無以示
諸生事遂寢人亦以是難之夫人柔嘉有容事舅姑如

公事父母自公起布衣為儒師三十年獨舉內政每見公嫉惡甚則諫曰此怨道也及聞其論議不下人則曰求益者固如是耶其平居未嘗問學而言輒近理道殆天性然也夫人卒於天順某年公卒於成化丙戌合葬於下長源都嶺背塢之原子男四某某孫三某某公教子嚴肅俾各治一經言行動履必有矩則夫人實相成之故科第累出而都憲公才行卓卓稱時名卿其為御史為按察副使兩督學政教法尤著人謂得諸家教為

多且公之未盡於用者亦於是焉驗矣然則揆之葬以
士祭以大夫之義既祀於廟又碑於墓傳之世世以為
後式固亦不可闕哉從而為之銘銘曰

職必務稱位豈在達公居黌宮有莘斯拔生徒如牆載
室載堂公來蹒蹒公去倏倏公才實兼若有餘地溢為
高談孰匪予事志之難行止或尼之歸斂諸身弗我失
之厥刑在家曰有良嗣公澤之施孰謂非試熒熒褒章
峩峩德門持以質公其亡其存公碑有銘愧我生晚庶

其勿諼以示悠遠

明故資政大夫南京戶部尚書致仕梁公神道
碑銘

初南京戶部尚書梁公引年請老時病新瘥所具疏詞
懇甚上惻然感之乃賜溫詔許致仕給驛歸其鄉仍命
有司月給米二石歲給輿隸四人恩禮特厚歸二年訃
聞復遣官諭祭營葬事益備數也公諱璟字廷美世為
太原崞縣人考諱資有行義鄉人稱為直軒先生贈資

政大夫南京戶部尚書性至孝少時直軒血出於面公以舌舐之而止正統己巳北邊肆亂直軒從征官兵潰公聞變被髮號且走求父所在值歸乃已嘗為馬邑縣學生後學革乃入崞學學成景泰庚午舉山西鄉貢天順甲申登進士第授兵科給事中成化初累遷都給事中論事持大體壬辰與諸同官劾大臣不職者因薦致仕尚書巡按都御史高明可用言太激切獲譴幾殆不為變癸巳擢陝西布政司左參政徧歷所部詢民疾苦


察郡縣吏稱不稱得牧民體分守洮岷適西番縱掠居民驚徙公提兵斬其魁男婦復業者千數以內艱去辛丑服闋復任巡撫都御史而下交薦於朝乙巳進右布政使丁未遷左布政使敷惠勤事視昔尤著在陝前後十五年民熟其名益宜之擢都察院右副都御史巡撫湖廣兼贊軍務公整肅風紀賑饑民理冤獄簡民壯以增武備永州寇作督官兵平之鎮守中官毆殺王親下公勘覆力拒請屬不為撓以外艱去壬子改四川有武

官驚不聽令公痛繩以法始皆帖服有劇盜亦督兵勦之甲寅擢南京吏部右侍郎會獨理部事事畢舉戊午進戶部尚書出納明審時已嬰疾庚申遂得請去及歸足不至公府徜徉山水間日圍碁賦詩為樂篤倫睦族事兄宗尤謹每宴會拜跪如少時所賜稟餼月必分給間以散諸族黨歲歉則出粟以周貧乏死者具棺斂葬之又建石橋書院以教子姓及鄉之俊秀給薪米筆札而時課試之續且屬屬其子曰無廢義學蓋其生平所

樂為者故至是猶勤勤云爾公敦雅厚重耐清苦遵矩
度不事矯飾隨所受任必稱事舉職閱歷既久資望兼
積人無訾議而又先幾勇退以壽考終延及子姓方隆
而未艾揆諸理數可謂不失其正矣古之語大臣者必
先出處其間幸不幸弗論惟所自處合時與義乃可完
其名而不辱其身苟終之不合雖有竒節危行卒歸於
無所用之地故非仕之難而保終為難公亦可以無憾
哉銘曰

公起諫垣出領方牧入為都憲兩鎮南服均勞內外徧
涉川陸政勤教條法慎刑獄亦有兵威匪我窮黷有言
有功並受褒錄既登留曹遂典錢穀雍容廟堂以率羣
屬官無躡資器不覆餗功成志倦勇脫羈束居駕康莊
永謝顛蹠若颿巨津既往而復彼疾行者匪溺斯踣相
彼川流往過來續亦惟天道盈禍虧福其所未竟後人
是淑家有遺書鄉有義塾有封在原公所自卜其幽有
銘永世斯告

懷麓堂集卷七十八



總校官庶吉士 臣張能照

校對官庶吉士 臣嚴福

膳錄監生 臣王應璧

欽定四庫全書薈要

集部

懷麓堂集卷七十九

八十一



詳校官候補通政司經歷臣郭祚熾

欽定四庫全書薈要卷一萬六千七百八集部

懷麓堂集卷七十九

明 李東陽 撰

後稿十九

碑銘

明故贈光祿大夫柱國少傅兼太子太傅禮部
尚書武英殿大學士謝公神道碑銘

弘治己未先皇帝覃恩臣下今少傅謝公于喬之祖直

菴公始贈資政大夫太子少保兵部尚書兼東閣大學士祖妣余氏贈夫人越六年乙丑今天子嗣位于喬以輔導功進今官及恭上兩宮尊號又獲以其官加贈祖為光祿大夫柱國少傅兼太子太傅禮部尚書武英殿大學士祖妣為一品夫人制得樹碑神道于喬乃自述事狀以屬東陽憶與于喬同在翰林入內閣稔聞公之志行才畧卑官小試厄於橫逆卒以終老暨其子資政公之賢然又弗顯而魁名重位正言直道偉然以學行

勲業顯於天下者乃於其孫見之向非抑遏屈鬱之久
且深亦惡能一發至此哉是則天道慶善之公徵諸聖
天子崇德報忠之典皆足以為世勸文而銘之宜也按
謝氏之先本台州臨海人宋季有行長二者徙紹興餘
姚之東山鄉公生而閎偉洞達孝友直義尤多聞識宣
德庚戌浙江布政司辟為從事長遇事敢言布政諸公
多折節從之進隸兵部尚書鄜公埜素嚴重寮屬無當
其意者凡章奏出公手則不覆視比旅試內廷混在常

等廊道公才行力爭之乃置優格奈侍郎享掌寺事挾中貴勢陵蔑官屬公每正色拒之為所構陷吏部尚書王文端公知之奏調福建布政司都事會沙賊鄧茂七作亂刑部尚書薛公希璉出鎮委公軍餉先是輸費三倍且弗繼公收積水次召業舟者使運之量子之直約有損則均其償皆樂為用民不倍斂軍食亦足承檄守松溪政和賊保官臺山為窟合處州賊掠平陽諸縣公以計招其黠者用其謀誅首惡宥其脅從還所掠婦女

童穉若干人賊遂平又奏政和地廣難制請割其二里
及福安一隅置壽寧縣薛公上其功進祿二級御史應
顯薦公可大任吏部以資淺格不行適薛公劾巡按御
史許仕達併及其素不謹事許京居嘗與公鄰疑事出
於公中以危法大理卿蕭公維禎察其寃將為申辨公
念日者言年四十六當失官歎曰命也不復自列既免
歸奉母嚴氏以居悉舉家政付其子徜徉山水間效仲
長統樂志論作寫情說以自况葺譜合族而周其貧乏

延師置塾教子孫皆立身應事之方鄉人有過雖衆所
憚者必加面斥然聞一善則獎譽不釋口尤篤舊故布
政使黃澤在浙公嘗以諫忤後被罪力為排解既而官
其鄉尤厚待之參政俞士悅待公國士後謫戍遼陽屢
遣使慰訪友人俞漢遠客死為棺斂歸其喪嘗買一幼
女既而知為宦家子女育之比長為嫁良族平生好學
卷帙不去手為詩文下筆立就多不存稿雅不喜浮屠
凡世俗邪妄之說一無所惑自謂以剛直得禍因號直

菴人亦以是稱之壽六十七嘗自制壽藏於雞籠山先墓
成化癸巳九月二十九日卒再踰月而葬夫人余氏同鄉
處士安之女溫懿端慤事舅姑孝敬備至處娣如常倍任
其勞公貧時恒以儉取足姑老不就祿留養於家躬事紡
績至老不倦其治家寬而有制為教亦然羣從子姓數百
指撫之甚周隣黨之嫠婦病媪待哺者不下十數家有火
警舍其家而來赴者甚衆嘗遘危疾女婦多涕泣請禱願
以身代至於逮下之德尤為姻族所慕效云壽七十六某

年月日卒越三月而合葬子一諱恩孫五于喬其長名

遷鄉貢廷試皆第一八命至今官次選早卒次迪舉進

士累官兵部員外郎清慎有祖風孫五長正次丕皆有

文行不失世守丕廕國子生舉順天鄉貢第一進士及

第授翰林編修以祖命為選後其所為贈以此銘曰

謝以國民自周申伯歷漢中微至晉乃發由安暨立將

相勲闕有鄉東山公蓋其裔公曰無徵寧遠毋偽公自

作祖綽有餘地公才實多可貢可科卑官畏途既蹶復

蹉直不徇物竟嬰禍羅人不足尤天其謂何公家有教
公子惟肖載堙弗宣天稔其報巍巍公門公有聞孫出
應瑞世為鳳為麟上補帝袞為龍為山志行道施有澤
在人風采凝峻蔚為名臣茲固間氣亦惟慶源其源維
何公自作祖世苟有濟豈必在我贈官賜秩視祖如父
計功報直亦固其所發潛闡幽於義斯可刻銘神道以
耀終古

明故兵部尚書致仕進階光祿大夫贈太子太

保謚襄毅項公神道碑銘

公姓項氏諱忠字蓋臣其先世本汴人宋南渡有曰秀者徙浙之嘉興曾祖永原隱不仕祖邦歷孝感吳江同安三縣丞及父衡皆贈資政大夫都察院左都御史公生於吳江正統七年舉進士授兵部主事遷員外郎十四年扈從北狩陷敵中以智自拔而歸進郎中景泰某年擢廣東按察司副使嘗按部高州諜報賊攜男婦數百劫村落部將請發兵公曰流賊無攜家理慎無恐及

訊其俘果皆良家被掠者盡釋之四年征瀧水賊以功
加從三品祿丁外艱服闋改山東按察司天順某年擢
陝西按察使值歲饑亟發廩給民不待報所活萬計丁
內艱軍民詣闕借留者幾千人詔起復公某年以大理
寺卿召借者再至乃改都察院右副都御史巡撫其地
洮岷諸番作亂公帥兵撫捕遂降其衆成化元年寇犯
延綏公與寧遠伯任壽奉命禦之戰屢捷寇遽遁去西
安水多鹵宋渠久廢公開一渠三十里又鑿涇陽鄭白

故渠溉田七萬頃民立生祠祀之二年敵酋毛里孩入寇公提督軍務與彰武伯楊信禦之寇復遁三年召還佐院事四年固原土胡滿四據石城殺我邊將將窺陝公總督軍務與都督劉玉討之伏羌伯毛忠戰死我軍遽退公即陣斬一千戶以徇衆乃定適禁出台斗人情恟懼公屹不為動據要害以困賊廷議請益兵詔以問公公謂兵不須益惟坐困可斃相持百餘日公單騎抵賊寨諭以福禍脇從者稍稍出降其逸出者皆縱使去

以孤其黨賊窮甚每突圍薄我大小三百餘戰皆却之禽其愛將楊虎狸公曰是可用也解所服金鈎賜而遣之約為內應卒禽滿四斬首七千六百俘獲二千六百有奇因奏便宜四事為經久計五年遷右都御史六年京畿大水公巡視順天河間永平三府多發官廩又勸分得米十六萬銀布牛具各萬餘所活尤衆荆襄賊李胡子者本劉千斤餘黨倡流民為亂公復總督軍務乃遣人持榜入出招諭其負險不服者縱兵搜捕凡發遣

還鄉者百四十萬編戍者萬餘斬首二千餘級獻俘於朝者百餘人仍獻便宜十事詔暫留撫治進左都御史蓋自南北用兵以來論功遷秩者至是而再降勅獎諭者五賜白金綵幣者六會有星孛於天田言者謂荆襄殺戮所致公再疏自列言為國任怨未嘗妄殺因乞骸骨上溫詔慰公且召之還後荆襄三十餘年牙孽不作跡其摧創之力未必非綏撫地也十年拜刑部尚書尋改兵部公曉暢戎務簡賢屬以自輔圖大展所蘊十三

年錦衣衛百戶常瑛者挾中貴為訶察屢興大獄至擅
執京朝官中外重足莫敢正言其非公奮筆具疏草倡
諸公卿奏之瑛坐謫戍邊朝野稱快而其黨競仇公不
置又有千戶吳綬先在軍中撓法為公所黜時亦用事
極力搆公欲寘之死公廷辯慷慨不少屈僅坐落職以
去久之陷公者次第皆敗上洞察公枉復兵部尚書致
仕今上登極及建儲恩再進階光祿大夫吏部侍郎彭
公韶巡視浙江特薦公可用而公年已至亦不果起壽

八十二卒於正寢弘治十五年八月十一日也上遣官
諭祭命有司治葬事贈太子太保賜諡曰襄毅錄其孫
鏞為嘉興守禦千戶皆異數云生二子長經舉進士歷
南京監察御史為太平知府有父風次綬累官蘇州衛
指揮僉事守禦嘉興側室朱氏生子四縉縉繕繼公以
十六年某月日葬象賢鄉之原鮑夫人祔公剛果沈毅
遇事敢為不惑羣議故能臨敵制勝累著勲伐及排擊
兇暴身犯大難中雖顛阻終暴白於天下而先帝知人

燭物之明今天子報功崇德不遺舊臣之義亦可仰見
於此矣乃叙其行業之大者而系以銘銘曰

昔在英廟賢俊輩出甲科繼登盛者壬戌有十尚書公
蓋其一掄才校功公在甲乙入典刑獄出長師律廟堂
中嚴疆圉外謚識機應變捷在倉卒持堅握彊勇定羣
怵公身兀兀其氣屹屹摧姦聖讒公有直筆公心鐵石
寧折毋屈彼繁有徒如鬼如獍野燐宵熠潛形晝匿陰
霾盪滅仰見白日乃困而亨匪滿斯溢壯當其勞老饗

其逸何以雪之生有階秩何以錫之沒有褒卹天王聖
明君子貞吉視彼徼幸疇得疇失惟天生才大者丞弼
胡成之艱而奪之疾惟士用世必先委質行孰我使止
孰我尼其間利鈍豈我能必公志既畢公澤未訖公功
在焉來者是述

大明故贈光祿大夫柱國太子太保刑部尚書
閔公神道碑銘

太子太保刑部尚書閔公朝瑛為監察御史時嘗獲封

厥考竹深公如其官階文林郎贈厥妣嚴氏為孺人為
都察院右都御史時公已棄養則如其官贈之階資政
大夫而妣為夫人暨其祖考妣皆然弘治癸亥始贈公
今官階光祿大夫勲柱國妣為一品夫人暨其曾祖考
妣皆然公念父德久弗白茲假寵於朝制得建碑神道
則以同年友請予銘公行具兵部尚書孫公原貞所撰
墓表孫為進士嘗使浙採圖史為尚書又統兵鎮其地
與公晤接得其賢為深東陽生晚獲與太保公同舉進

士與聞世德義亦有不得避也按閔之先本汴人從宋南渡至臨安徙居烏程之晟溪今湖州屬縣也元季兵燹譜逸不可考公曾祖諱某敦雅去俗為後進師表稱牧齋先生祖諱性考諱綬皆富善好禮為萬石長惠加於鄉公諱節字以度竹深其所自號少失恃克自樹力學通經籍工古今詩體每家居尊祖合族訓督子弟義敦舊故傭佃者厚議其直貸不能償者折其券值歲饑解橐以周餓者給婚喪不舉者甚衆性易直人有過必

加面斥而非理相犯者不為校鄉之人無遠邇疏戚必
以長者歸之曰閔公厚德其後弗昌者吾弗信也嚴夫
人諱貞字淑澄子六孫六曾孫九自某以下及諸曾孫
皆公所不及見而來者尚未艾云予聞江南多鉅家望
族而貴富不兩得若子孫綿衍久而彌盛者指不能一
再屈意福祉為造物所靳非積行累善宜無所能致竹
深公躬服德義不見用於時厚積大發固其宜也太保
公以才行為三朝耆宿百僚冠冕揚顯之道於斯為極

論者徒見其恩所由起而培植啓迪之善鮮克聞之然則
勒銘紀德雖緩至今日而具美備載若有所待而然者後
之人尚亦有徵哉銘曰

浙有封君家始由盛世歷三紀王三錫命其命維何御史
尚書宮保載陟階穹禮殊山林廟廊韋布簪組既晦而彰
名徧天下誥增舊秩廟飾新主有宗暨媀改聽易睹朝書
暮詩我實教之生榮沒昌我實召之若田在耕既稼而獲
若桑於蠶既績而織以小喻大乃物之則此地之宜矧種

斯德維德之效有倍斯百有徒斯綿由曾逮玄弗娛目
前以慰九泉刻銘匪稽以俟厥全百世之下鬱哉斯阡
明故贈通議大夫南京禮部右侍郎馬公神道

碑銘

西充馬公諱覺照其字曰悟明其號曰圓山居士其贈
官曰通議大夫南京禮部右侍郎其先出果州其祖元
保寧路鎮撫月滿始遷西充其父愈音號龍門居士其
子鐸號虹橋居士為國子生三世不顯皆以號行及其

孫廷用始舉進士累官南京翰林院侍讀學士獲贈其父及為禮部右侍郎乃贈及其祖論者謂馬氏之顯自公始云公性朴厚與物無競且樂施予少喜浮屠法鄉人有小訟輒為開導不煩官府而退者往往有之嘗患舊塋卑濕躬相吉壤遷其祖若父於青草溝之陽廬於墓左負土植樹三年而後去有白鳩巢於墓木人以為孝感所致從兄庸為稅課司使卒於荊州公負其遺骸歸葬之撫其孤不異己出蓋其家居所自盡者如此間

遊江湖下瞿唐過金陵北走燕薊觀兩京宮闕臺署衣
冠文軌之富慨然歎曰名教中固自有樂地也既抵家
盡屏舊好遣子鐸為科舉業及孫廷用甫髫髻為擇傅
就學步送於三百里外家雖貧膏火筆札之費不絕於
道廷用攻苦力學舉鄉貢報未至而公卒公娶淑人朱
氏勤儉有則善綜家政遇中表族媼並致親睦廷用之
為編修也猶及見焉公生於永樂某年卒以成化某年
墓在岳店廟之東淑人祔焉鐸所卜地也公子二鐸其

長次曰鑑孫五長廷惠授將仕郎廷用其次曾孫十金倫
皆舉進士金累官廬州府知府會吏部考功司主事全國
子生企義官玄孫三蓋其子姓之盛如此而以女稱者不
與焉馬氏居西南僻地世以農隱圓山公用儒學為教再
世乃發至以父子登甲第內列曹省外領州郡文學政事
先後相輝映而敦朴易直之風固未改也是其深培厚積
理實有自致者豈直虧盈屈伸之數固當然哉然則公之
名已達之朝廷籍之有司見之辭命典冊之間由是而託

文字刻金石以昭來世固孝子之志亦史氏之所有事也侍郎君追慕先德久有待於今日者謂予為翰林舊寮特述事狀請銘於神道之石乃為銘銘曰

西充之陰有山紫崖或若五馬從空西來有壤可居有原可葬生斯葬斯曰維馬氏龍門圓山是父是子載營載遷相望伊邇圓山有子惟孫是似子堂未構孫幹其蠱既錫其父肥及於祖龍章鳳函下照林莽山若增高地若增脰彼陬豈遐若在畿輔九原有知公掌可撫穹

碑巖巖金書石刻掛於新阡有來必瞻晦極而彰理則
可占太史作銘以發爾潛

明故贈通議大夫都察院右副都御史畢公神
道碑銘

贈都察院右副都御史畢公為教諭時以其子亨為吏
部主事棄官就封後累封至都轉運使及亨為副都御
史聞公喪歸自甘肅值今天子恭上兩宮尊號恩贈公
今官給正三品誥命制得遣官諭祭有司治葬事恩數

備矣畢氏族望濟南之新城曾祖諱慶甫祖行二以行稱世有隱德考諱鐸贈如公官公諱理字文義生而魁偉重厚穎敏內發居鄉無師傳學禮經自得奧旨為縣學生累試弗售天順己卯次當貢有伊某者親老且貧甚憐而讓之遂領山東鄉薦庚辰中禮部乙科授鳳陽懷遠學訓導懷遠久乏科第公擇少俊十餘輩躬督教之自是舉者先後得二人以母喪闋服改保定東鹿舉三人秩滿考最遷開封西華教諭西華之士如懷遠而

舉如束鹿之數父喪服再闋改彰德安陽安陽多貴官
子不帥教公益嚴條格其舉者有加焉蓋公以篤志實
學操矩矱為身教故隨厥所至類能有所成就四縣之
士銜感恩德雖越地累歲視之若父母然其鄉黨後進
經講授者多舉進士為顯官如御史孫敬于壁布政使
李延壽此尤可指數者也晚號敬齋學者因稱為敬齋
先生自致政歸以泉石詩酒自娛縣官禮請為鄉飲大
賓者幾二十年年八十有一而卒生洪熙某年卒以某

年配高氏生同鄉有懿德孝敬勤儉少老如一日視側室若同氣撫育諸庶無異已出累封至淑人以今弘治丙寅某月日合葬於吳公山之原太淑人亦賜祭焉子五亨其長舉成化乙未進士累今官以廉能稱於時次成夔龍孝成龍皆縣學生孫五長昭弘治己未進士累官工部員外郎識者曰不愧其父自公以禮學教於家用是取科第者三世矣都憲君以予同朝久嘗接公風範昭又予禮部所舉乃奉吾友左副都御史揚君應寧

狀請銘公神道而以母德附焉禮也銘曰

教士得第國課其最其所得者為遷陟地計功報直維
有司事矧有遺教及鄉子弟匪我職者功實兼倍天則
課之錫以繁祉其祉伊何曰有賢嗣維子父述維孫祖似
教實自我成之在天天道國法有符契然貽我身後繫我
目前官我能棄敢幾報焉校彼自得不盈一間匪流斯
長曷沂厥源父教既著亦維母賢我銘畢公以耀九原
大明故資政大夫都察院右都御史贈太子太

保左都御史史公神道碑銘

公姓史氏諱琳字天瑞在憲宗朝舉成化丙戌進士為
工科給事中擢江西布政司右參議遷左參政孝宗朝
歷遷左右布政使擢都察院右副都御史巡撫保定諸
府兼督鴈門諸關歷工部左右侍郎兼左僉都御史經
畧邊備以秩滿進右都御史提督軍務署院事今上皇
帝以提督功贈太子少保左都御史未幾又以卹典加
贈太子太保凡閱三朝四十年官十命其卒也給驛傳

遣官護喪治葬事賜祭者再及加祭亦如之蓋其始終
遭際之盛如此可謂難矣初公為給事時言事有體為
參議時平鞏昌番賊修安定會寧諸路邊備督甘涼軍
餉事皆集以家艱闋服改福建有求開銀礦者公力沮
之為參政時豪家多怙勢庇盜每為禁治袁吉二府饑
發廩賑貸全活甚衆贛盜攻城邑殺官吏督兵勦之獲
七百餘人梟其首惡脇從者皆釋不問為布政時藩府
歲祿多倍取民困輸納請自所司類輸之始大稱便為

巡撫時定均徭優戍卒開小河以殺溲沱水勢復真定
保定二府柴夫舊額大明諸川果園皆居民世業嬖臣
怙寵者奏取以備供應公力言不可以數千人之命供
一已之奉辭甚激詔遣官覈實果如公言乃止為侍郎
時嘗以災異言止織造惜供應諸事為經畧時言募軍
丁禁盜賊省中官差遣諸事多行之為提督凡三命始
赴宣府大同值敵退會兵食為後計後敵寇榆林率偏
師先往暨大帥至共謀覘敵首所在夜潛師搗其巢賊

聞礮驚遁毀其廬帳而還以捷聞賜勅褒諭副以銀幣
寶鏹入朝言便宜事加詳弘治乙丑新遭大喪國事方
劇適宣府失利遽命出師公與大帥分駐宣府大同大
同諸路斬獲以百計捷再上褒諭如初特命中官迎勞
於關賜賚甚厚下暨部曲並加犒賞殆近歲以來所未
有也今年丙寅為正德紀元正月十二日以疾卒自居
九列前後請老十餘疏輒得溫旨勉留其在新政尤多
眷注而勲業未究卒齋其志以沒悲哉公性本孝友其

先世居浙之餘姚元市舶大使應炎為宋防禦使張疇子去史為張姓七世矣公始請於朝復舊姓事其祖處士府君諱仲昇考教諭府君諱才甚謹皆累贈如其官顯其家調恤親黨不遺餘力其為人坦夷宏豁不設崖岸意常近厚人以故多親愛之平居不事作業家無餘貲然終其身未嘗以屑意也號一拙而實多藝能戲作墨竹自謂天解尤好談兵於諸推步占候醫藥之術靡不通涉比見熒惑犯執法謂人曰是必有當之者已而

左都御史戴公廷珍卒曰未也不踰月而公亦卒乃撮其大者為銘銘曰

有偉一人生南東長軀廣顙聲洪鐘蚤占骨相非凡庸
溺水不死驚羣童殿前射策回重瞳諫垣啟沃開宸聰
關閩楚地三藩雄力折強暴蘇疲瘥手操憲節巡畿封
入貳邦土官冬工豸冠象簡乘青驄出門按劍氣如虹
部曲百萬皆貔熊三邊四顧多狼烽銜枚夜搗穹廬空
五年再出威權同北走上谷西雲中敵來如雲去如風

公歸獻捷明光宮臺評廟議坐雍容武戢不用文治隆
扶搖萬里方上翀六月一息何匆匆稽山鏡水精靈鍾
公往歸之可長終神無不之感必通或者尚在燕然峰

明故中憲大夫太常寺少卿兼翰林院侍講學
士楊君墓碑銘

國朝廕錄之典惟大臣有之然不甚顯其顯者必其才
足以應選舉膺任使資累序積乃得之而亦鮮矣若學
士楊君知休固其人哉君諱時暢知休其字世望西安

之咸寧曾祖諱惟敬祖諱森皆累贈資政大夫戶部尚書考諱鼎舉鄉貢會試皆第一廷試第二歷翰林侍講官至資德大夫正治上卿太子少保戶部尚書贈太子太保謚莊敏君其伯子也少美丰姿能問學莊敏公為侍郎例得廕子君以讓其弟時達既舉進士授翰林院檢討修憲廟實錄以勞遷修撰充經筵講官今上在儲宮君以廷薦侍講讀改春坊右贊善九載秩滿進左諭德以修大明會典勞遷侍講學士續修玉牒以登極恩

進太常寺少卿兼職如故復以兩宮尊號恩進階中憲大夫預修孝廟實錄初開經筵復充講官其在成化時尚未顯越弘治正德間多所歷試史職之外會試為同考廷試為受卷彌封讀卷凡儒臣所有事無弗與者自餘若分獻郊壇陪饗太廟清理武官誥黃預觀籍田從幸太學賜坐彛倫堂恩禮尤渥玉牒之進君按宋制於正殿登受亦前所未有也其所被賜若冠服金幣寶鏹珍饌諸物不一而足卒之日上追念舊勞特命官致祭

營葬給驛歸其喪其長子依澤先以祖廕為太學生至是改命肆中書舍人業出身仍許其仲子依江補廕為生蓋莊敏雖以勲績聞望顯於時代而在翰林未久輒擢故編摩講讀之務所以遺君者猶多而廕錄相續又遞為序進固公以文學遭際明聖有足自致實莊敏之澤未艾也君為人內敏外重意常近厚倫誼尤篤莊敏之歸即欲終養不果乃請侍以行張氏姊寡而無子養之終身後被旌為節婦譚氏妹有遺女為嫁名族諸弟

既失怙並加誨導時敷為兵部員外郎時達為順天府
經歷時敷卒育其孤於官及君之喪羣從環列伏哭皆
如禮亦以見故家風範如此云依澤將樹碑墓道奉左
庶子毛憲清狀請予銘君同在院署久予弗能忽也因
掇其行實之槩為序銘曰

惟莊敏公昔事英祖肇登甲科終致台輔老歸其鄉弗
究厥施教成於家有子似之孰其似之曰維伯子為名
進士為世太史越在憲宗暨於孝廟今皇嗣基臣職是

紹經業有門周彖義文史法有傳鉞貶華褒講幄敷陳
藝苑甄擇有一於斯皆公遺則有笏堆牀有里鳴珂仲
叔之間孰與伯多譬宮室與田將獲將構而成弗終抑又
誰咎惟卹有典兆域是營奕世遺恩二子是庸咸寧之
墟先公所藏君往從之百世勿忘

懷麓堂集卷七十九